

48387

مرسومة بالاسود

اشعار بالعامية المصرية

وسام قابيل

وسام قابيل

مرسومة بالاسود
(أشعار بالعامية المصرية)

الطبعة الأولى ٢٠١٣

رقم الإيداع // ٩٧٦٨ / ٢٠١٣

التزقيم الدولي // ٩٨-٥ - ٩٨ - ٦٤١ - ٩٧٧ - ٩٧٨

تنسيق رسوم داخلية وتصميم غلاف
إهداء من الشاعر / محمد فكري



دار روعة للطبع والنشر والتوزيع
darrawaa@yahoo.com

المدير العام : هبة الشرفاوي

هاتف : ٠١٤٠١٧٨١٤٤


الاهداء

إلى كل الأيدي البيضاء التي جعلتني أضيء كل هذا الأسود

إلى ونس روجي .. زوجي : محمد فكري

إلى من علمتني الحياة والجنون : مي فتحي

₹



٣ بنات

إهداء إلى روجي القصيدة :

هي فتحي- تسنيم فهميد



كان ياما كان

كان فيه بنات بعشقوا رمي الدلال ع الضل

ويشتهوا جعل اللا شيء كيان تالت

ضحكهم

يشبه التفاح في روحه

عمرهم

يشبه الأحلام في نومهم

هيه الإيدىن معقودة سبعة ف حبههم !



كانوا البنات زي البنات

يرحموا وشوشهم قمر

يدهنوا خدودهم خجل

يقلقوا نوم السما

تتبدّر ع الأرض شمس



(١)

دايرة تدوق الشهد من روحها

كبت حلم وصلها جروحها

وآه لما تضحك بالبكا نوبة

بالفرح نوبة / والغنوة تجرحها

(قالوا الجمال احنا والدلع غالب

لو يعرفوا جروحنا ييكونا بالغايب

قالوا الطباع راسية ودي روح ملايكية

قلنا الحياة قاسية والدمع صار غيّة)



حاسدينها ملو العيون على ضحكة مش صافية

قالوا صبية مليحة والعيون كحلى

والفرح لو بالشبه يبقى الجميع سعدا !

تنقل تنط الحبال والروح مطاوعاها

توصل لسابع سما ولا تلتقيش بالأرض

ريشة / ابتسامة رضا

مايهمهاش البعد !



(٢)

" وبحور الهوى إذ هاجت

ليس لها من قرار

كنت أحسب قلبي معه يس

غرته ذي البحار

صحت لما وحثت يا محبوب بحر عشقك يزيد

خفت فيك الفرق قال افرح

من غرق مات شهيد! "



سمرا بلون ما أخذش مني كثير

قلبي اللي طابع بهجته نوري في الصورة

موصولة ببيك انما

حين ارتمتنا السما

قسم النهارضلنا فلابد نتفارق

ساري في بلدنا البنت

مايعشلها عاشق !



والبنت زي الضي .. من لحظة تعشقها

فيك اكتمال الروح في البعد كان شوقها

والبوح بملحه وقوته ع الحزن مايقدرش

صاروا البنات غاصبين ع الدمع مايتزلش

كل البنته ضعف والدمع ما يستترش !

- - - - -

الصبح / يغوي الجروح ترتحل يلقي الجروح عاصياه

يا محرمين الهوى ومزودين الآه

دا العشق داقه النبي والمعشقة في الله حياة



والطير لولفه ع الشجر عاشق

الورد داق الندى صار في المسا

عاشق

والشمس نور القمر كان في الكسوف عاشق

يا محرمين الهوى ومزودين الآه

دا العشق دقة حياة ونموت فداه

شُهدا !



(٣)

بترمم الحكايات على حافة الذكرى

جذب الغروب تستحي فتلخط الألوان

بنت الغياب والصبر.. لون البنفسج في السحر

خجل انسحاب القمر ساعة ما يصحى الفجر

كان الضمير هيه وأنا البعيدة البعيدة

منقوش على أيديا خطين مابتقابلوش

رزق البنات فرحهم ورزقي ما طولتوش .. وان هبّ قلبي وحليم

ماييلتقيش مرسى



وأروح ولا بنسى ملامح حلم كان مرسوم في عين أُمي

وطاقة روحها بتصلي وتدعيلي.. بطرحة وبيت

— — — — —


بكتبي لما بتوه في كام شبه ليا

وأرسمني ليل في الشتا نعسان على ايديا

لي أن أثور من بقايا المطر / لي في الخريف كبرياء الشجر

لي في الحياة أن أكون بطعم كل البنات

(*) دور من التراث للشاعر ناصر الغيطي



البيت



الأرض غربة
والتراب لساہ معطر بالحياة
واللي واصل بيننا أكثر من حاجتنا ل اللقا

كان المكان
بيت يجمع شملنا
بحكمة تجلي قلوبنا بيضا رغم جراءة الاختلاف
والحياة..جواه عشان الجايّ يحلّى
والسفر..دايب في لمة
وضحكة صافية
وايد تططب ع الصور



جدي اللي كان هنا
علشان ابويا هناك
دائماً بييني في الدفا بيتنا
ما تخفش م العفاريت ولا صوت فراغ البيت ولا حضرة الذكرى

جدي اللي كان
-فجراً- يحب الشاي ثقيل مدوبه سكر
بيكح حرصاً ع الونس تمويه في قلب الليل
دخان سجايه المستحيل كان يترسم جداً
حضر لأبونا حابسينه في الجوابات
كان المكان ضهر لبنا ولمة في الأعياد



وجدتي..

حببي جدتي..

ساعة ما تحكي لي الحكاية وتبتسم
ما تسيش فيا غير خوفي على بكرة
مين اللي راح يبتسم ويكمل الحكايات !

ويسد عين الحسود

بسر السبع رقوات

وأحلى كحك العيد وطيارتنا الورق

وريحة المواليد..جوه دولاب بيتنا

ودمعه حابسينها

ونقط ..نقط ..نقط..



كان هنا

أو كان هناك

بيت يجمعنا

رسمت فراغه في اللمة

وخفت لتنتهي حيطانه

حروف في قصيدة

ناقصها بيت !



ملاك

(فاصل شرقي)



رغم الشبايك المقفولة بغشومية
إلا إن الناس مصممة تفتح وتبص
الوشوش شيء يخض.. يخض قوي
وانتي لسه بالمريلة البمي دافسة راسك جوه الخوف
بتبصي ع العيال في الذاكرة وهما بيغنوا الغنوة بتاعتك
تترفزي/تضربي الواد اللي واقف في الهوا جمبك



وتغني:

القطعة المشمشية حلوة بس عبيطة !

الوشوش توحش أكثر من غنوتك


تتداري في الحيط والخيال

تتمني إنك ترحلي في إدين ملاك من سنك كده

هو فيه ملاك عمره ثلاث سنين

متزورين عشرين سنة !

۱۲



بنت موت



على بابنا شجر للخوخ .. بيتوانس مع روحنا

وأمي حجابها فيه بايت

عشان ما ف يوم يفرقنا حسد ولا شر

فيغلبها هنا في الليل -تلات تحرف -

ويربكي قوام فاكبر

ياموت ليه ديماً مالکش عزيز

داير تخطّف في الوشوش الورد

ليه بتهوى تقصر المسافات

مش ضروري تكون حريص ع الود



خليبي لسه صغيرة بتدّفي بالحواديت
خليبي لسه بتكسف م الصبح وبياعين الفول
مايخضنيش لون السواد في العزا

ولا ضلّ ليك ع الصور

خليبي لما أحس طيفك فات على بيت الجيران
ما احلمش بالعفاريت
خليلي لمة وبيت

طعم الفرح بالصدف
غزل البنات في الشتا/وكُلفة في الفستان



ياموت

شفتك في بيت (أشجه) جارتنا زمان

شفتني ؟

ماهنيش منك تخطفني مع جوزها

شفتك بتطلع به السما

والناس بتدفن في التراب خوفها

شفتك هنا عامنول بتفوت على بيتنا

واخذ معاك جدتي بتعدوا الخطوات

ما اعرفش ليه وقتها لما ابتسمت بكيت وجاني خوف منك



خوف مخليني

أطوّل في السجود حبة عشان أمي ماتربكنيش
بانك للي ما صلاح يوماتي تخض أحلامه يقوم ماينمش

يموت الحي لو شافك هنا ف الحي

يدوب البرتقان منك يتوه الضي


كما توهني في الإجابات زمان - جدي-

ازاي بيهرب في العزام الناس / يعملهم حصرة

يصدّ البنّ في الصوانات / يضحكله ع القهوة !

يقول أنك أكيد الخير مادام مش شر

وبعد الشر لو تنهي حواديته.. بعيد الشر



رسالة ا



زي ماتقول اتقسمنا في السما

والقسمة كانت منصفة جازر !

كان ليا روحك ورسمت بالفاضل ملاحك كلها فرسمتها كلي

انت وانا حين نلتقي نرسم الأيام ربيع

نبتسم زي العيال لما يغلبهم فضولهم

نرتجل إنشاد ملايكة كل ما يوصلنا نور

انت وانا شيهين لصورة من الحسد حبيننا بعض

مش محظوظين .. يمكن صحيح مش محظوظين

بس واصل بيتنا شيء كل ما يبعدنا نعشق




هو الهوا يقدر يفوت


مايوسش شباك اتفتح ع الفجر من أول يناير؟

انت وانا شباك ونسمة ربنا

بفتحوا قلوبهم لبعض




رسالة ٢



وآدي شجرة ملونة بتطرح حرير

واغزليني مراية وشفيرة وزمن

طرزيني في ارتباكي وردة مشغولة بحذر



وأعقدي الخيط اللي فاضل بالشفافيف

لجل ماتفكش في ربح

من دواعي الذاكرة

رسالة والراسل ... فص حلم وهرب !



الرصيف



الصورة عاتمة والطريق مش واصل
والتوهة في النفس كفيلة للهروب بخدا ع
الناس مسالمة جيب مني
وبرغم ده مش راضية أسأل ع الطريق الصح
الراجل الساكن وحيد
باسط كفوفه للخلق مش عايز فلوس
الراجل الساكن وحيد
على سلم الكوبري المكسّر
مادد إديه للونس لو تعرفوا تقرّوا الكفوف



هنا ركبت الميكروباص للبيت

هنا لحظة ماتبكيك البيوت والحزن يطرح نبتته

تلقي الحياة واجب ولازم تعمله

ابسط كفوفك ع الطريق

شكوى/حبة أمل لله

— — — — —

عندي رغبة في البكا والاغتراب .. والخروج بره المدينة الحزنة

منظر مثالي في القصيدة

لحظة دخولك في الخريف في عز فرحك بالشتا



الشجر .. ما وقعش ضلّه غير على الست العجوزة
والكفيف .. عدّى الطريق بحكمة الشيب والتأني
الريحان .. ما حجّش روحه عن شاب مبتور الذراع
السحابة .. اتزحزحت عن طفل عريان في الشوراع
وعيلة .. رابكة الاشارة بدمعه فوق منديل ورق
كان التسلسل منطقي -بره الحياة-
فاصل صغير / ست علامات للعجب !!



الخريف .. ودع ملامحه جوه أحضان الشتاء

والكفيف .. كف احتياجه للبكا

واللي عايش دنيا كاملة بنص روح

مايربكوش لحني المنشز

في بيت مكسر زي ده

(قدّ ما اتسع صدر السما

قدّ ما عشقت الحياة هنا .. في القصيدة)



قهوة فايرة

(فاصل شراب)



الناس ملمومة في بيتنا
شذاهم ريحة المستكة الحروقة في القهوة الفايرة
سحباهم جوه الجسم المخلوق بالصدفة بناي
سكر ماما بناي كمان
بس ما بتهتمش بيه اهتمامها بالبت الكتيرة
اللي مفردها مذكر ناقص



زحمة البهرات في صوتي

شيء مخوفه

خوف أمي ثلاث رقوات في اليوم


وفي آخر رقوة تناوب بتصنع

عشان تأكدي إني محسودة

وان فيه رجالة كتير بيشرّبوا القهوة من غير وش !

1

Δ.



تحت المطر



في عز الشتاء

والدمع بيلون عيوني قوس قزح

والذكريات ..سكر بنات

دايين في حبات المطر

تلقى البيوت خجلانة من مية سطوحها

محنة صورة

في طين شارعها

دفيانة من جري العيال



تحت المطر

كنا بنجري رافعين إدينا للسماء

بانين بشوفنا حلمنا - لحظة أمل -

والبرد كان صاحب أمين بيلمنا

صُحبة ورود تحت المطر عطشانة حب

في ثالثه تالت

كنا التلامذة

بنحب نرسم في المطر أول حروفنا

ونعانده البرد اللي فتفت في الهدوم



"الدنيا برد وما بردناش

والورد مش محتاج مية

وعم خليل كان طيف ومجاش

وقملي نضحك والدنيا برد"

تحت المطر

صرنا البنات

قافلين إدينا لتتفرد تقع الدبل

والبرد صار مدلول لخوفنا من اللي جاي



أذكر في يوم تحت المطر

حيننا نجري فاتكسفنا

لينا روحنا ورحنا حاضنين المطر

وف عز طوبة نزلت دموعنا

وهمنا في القول وحكايات

لكن تملي ف ليل الشتا

تحت المطر

بتعيش حاجات وتموت حاجات

واهو كله فاني حتى ضحكات البنات .



حظن السما .. بارد



- القمر -

القمر

بنت عذرا

هربانة من عرسها

محلولة ضفايرها جناحين يمام ابيض

يا راسمة السواد طريقين

جذب حدود القمر

إن حركوه بمشيئهم إتخروا من نورك



مسحوبة منك روح تايهة في روح ثانية

عائشة كما الطير المهاجر في السما

إن يشتهي في الأرض حزن يلخبطوله السنة

كل الفصول هجرة .. هجرة في ديل هجرة

حزن السما أوسع لكن كمان بارد

الموت ما هوش مشكلة ولا لون سواد الحلم

لولا السواد في السما ما كان للقمر لازمة

أنا بس نفسي أحس الفرق اللي مش واصل

بين الحياة والموت !



- الشمس -

الشمس .. بقعة كبيرة متلونة بحلمي

والخوف .. خطير

سحب الدفا منها وبرّدي

والكبايات في بيوتنا مقلوبة على وشها

حابسة البكا أنفاس يمكن تدفينا !

عايشين حلاوة روح تايهين في أحلامنا

دايين في قلب الزحمة لكن واصلنا البرد.



سر اشتياقي للسماء صمودها

إزاي تشيل النجوم والقمر / شيب السحاب والشمس

كل الملائكة الشفافين والأنبياء / المذنبين والطيبين والعرش

كان اشتياقي للسماء إنها


رغم اكتمال حِمْلِها ما بتتحنّش للأرض

وحده تلاقي البحر يحدّ عنا لما ينفرد طولُه ع الآخر

يحضن بشوفنا الشمس

وأذكر لمن فيها حكمة الجد اللي فارق

" لما السماء تقفل ببياتها ف وشك ثِق إنها لوسعها بتختبر صبرك "



تخريف الحزن



لما تلاقي ف روحك شئ يبحن لشئ مش ليك

وإن المطرة بتجمل طعم الأم

بتطيب خاطر ك ببساطة

بتوسع خلقك ع الدنيا

لما تلاقي كل هدم العيد حضراك في دولاب الذكرى المكون

وبتعمل روحك بالونة لجل ما تتمنى وتتباعد

جيب الشباك قاعد ترسم تحت الشجرة قاعد تقرا

والشمس بتحكى الحدودة والديك متفاظ منك جداً

من كسرك حظر الحواديت



لما تحس يان الأوضة اللي انت بنيتها بأحلامك صغرت فجأة
عليك

وان ولاد العيلة في نفس اللحظة بيعجزوا فيك

وانت ياعيني لسه صغير بتصحّي العصافير م الفجر

لماتعيط طول ماتشوف طفل من البرد بيتدارى في الحزن البايث
في عنيك

لما تطيطب على قلبك بشو يش


وتقول هانت وهيه لا هانت ولا حاجة !



لما بتمسك قلمك دائماً كل ماتيجي تروح في النوم
علشان تبعث للي هيظهر جوه منامك
حبة جوابات خيانة كان صعب عليك تقراها ف وشه
لما تشوف الصبح يسبق عينك ع الصحيان
تستحلفله لتغرقه بكره في النوم وتقوم قبله




لما تدمع وانت بتقرا كلامي النونو
وتحس بغربة طفلة بشريطة طَوَّل منها العمر شوية
وسبقها لسن الثلاثين
يبقى أكيد لساك إنسان متصاحب على حبة خير !




حبة عيال

إهداء إلى الطفل: مالك عبد القادر عمر

علنا نلتقي في الكبر !




حبة عيال حافين
نايمين في شجرة توت
ناسين في شباشبهم طعم الحياة المر
ياضحكة في عيوتهم
مليانة فرح وبكا
مين اللي علمهم إن الحياة بوشين
نايمين كنّ اللي جاي عابر سبيل على ضلّهم
ما يستاهلش الخوف
صحيح حبة عيال ومين فينا ما نفسوشي يكون عيل !




(١)

يا طوبة .. خدي متنا فرحنا و صبانا
وما سيبي في قلوبنا غير الجراح والخوف
فيكي الوليد أزرق وحيد عريان والسما تبكي
تجيب بكاهها حين جل ماتيله
صرخ الوليد.. قلب السما انفطر
نزل المطر دافي حن له الماشين
وانت اليتيم في الليل والبرد كل توبك
ربك كريم
دائماً يهدي الطيين للطيين




شايقة في عنيك النونو
طفل بيضحك ضحك حزين
فارد إديه النونو بيسقط الأحلام
وملايكتك جحك بتغني جل تنام
" يابكره سرجيك مرجيك ع الحلو النونو ماتقساشي
وتفرحه الله يخليك وتبوسلي خدوده ماتنساشي
يابكره أذفعلك كام وتصون الروح الدبلانة
من كتر قساوتك ياطوبة"




(٢)

حبة عيال طالقين في الهوا روحهم
تقولش هما طيور !
راسمين حدود السما نجمات في كُراسهم
ما بيقصفوش الضيَّ
على حبة عيال طول كده شاردين وأنا منهم
مايصعبوش ع الحى
ياشباط شحيط ولحيط ولف ودور
وسيني ادور وباك
أنا طير بيعشق هوا غيمك يضيره شمس شتاك



ويشبهني ضلامك ليه ؟
بنتشابك مع الوحدة
بنتدقّى بحدوته في دار بالنّيّ
أنا الراحل مع اللي جيّ
يتيم العمر والذكرى
ويغلبني النهار فجأة ف الفّ وادور
أبيع مناديل .. سبح وبخور



مدد يا شباط


يا برد ونور..

يارجفة شمس مكسوفة من الغلبان

يا طير حيران يصحوه العيال بالليل

فيبقى نهار

v7



قوام البلح



صاحبتهم الشهقة البريئة

لحظة حضوري في ضلهم

أشهد عيون منهم قاصدة الحسد واللوم

راميين هنا خيالهم

على بنت من نورها طارح قوامها البلح

مؤرقات للنوم




مين اللي قال إن القوام الخلو ده مايلبسوش الجرح

وإن المسافة الضيقة بين الصداع والصدر ماتخضش

مين قالهم ان ابتسامتي دليل مؤكد ع الفرح

وإن العيون المبسوطين مايبتتموش للحزن!؟

Λ.



القاهرة ٢٥



دي حدوتة ما بينامش العيال فيها من المغرب

ولا بيخافوا م النهايات

وفي البدايات

بشوف البنت بتقص ف ضفايرها كده ع الريق



خلع الحمام روحه .. سبح بحرية

يا شعرها المنكوش .. ساكنها جنيه

قادرة تحوش الشمس ما تزورناش

والسما خرزاية زرقا بتلبسها الملايكة حجاب

تحرس عيون الشاب

لحد ما يجيلها



دلّيني على روحك

إزاي قدرتي تطيري

تجمعي كل الضحايا المقهورين

تعمليلهم في الصلاة صفّين ملايكة

تحضري الغائب صلاته

فيبشتر الصابرين



علميني ازاي اصيغ روح القصيدة

رغم ضعف الموهبة .. واكتمال الحزن

إزاي اقول اني هتفت بعلو صوت الحاضرين

فاتردّ صوتنا رصاص

يسبق هتافنا إيماننا بالسما والوعد

كاملين ومش مالكين ان احنا نخضن بعض

كنا هناك صورة تتحس لحم ودم

الحي فيها الرصاص

واحنا ضيوف هذي الحياة ع الموت



نبي جدار حلم اليتيم في القاهرة

حين كان أباء الحلم

كلهم صالحين

رحنا نشوف الموت صديق

بيسحبنا للقمر بشويش

كبسمة طفل عثمانة تصورها

تقوم ماتجيش

ويتبقى شوية دم في الصورة

فترسمه علم وميدان



هنا ضل الفقير/صرخته وبوحه

طلة الخايف من البلكونة/جراة الشاب اللي مات واقف

هنا طيف الفجر مش خايف

يتزل نوره في ملايكة عشان مانضيل

هنا يمكن أقول الحق

عشرين سنة بلخبط في النشيد عن قصد

إزاي تكون أمني وانا الغريب فيها

أنا الحي اللي مات وروحه لسه ساكتها

أنا الشحات فقير الحيلة والسكة



هنا في المكان ده والزمن - في يناير -

اتولد جوايا حب الأمكنة

صابتني الحكمة والجرأة

" تحيا اللي عاشت نائرة "

مات اللي يتّم فرحها - ثلاثين سنة -

يوسّع توبه جوّه النيل يدّيق روحها في الحارة




هنا طلعت علينا الشمس من نومها

لم نتخذ من دوفها سِتْرًا

ما يخافش منها غير اللي خان

واللي سرق

واللي جعل روح الميدان كلها شهدا



هَيَّ وَاَنَا



إيه اللي ممكن تعمله الدنيا
لبنّت عايشة في الغياب بروحين
بذكريات مؤلمة من كثرها نستّها
وحبة قصايد متبعترين بيبرّروا وجودها
إيه مثلاً؟



تحضر لها الغايين في شوق كالضي؟
تفرحها / تبكيها من الفرحة
هو البكا موصوف لها في أحسن الأوقات
في أصعب الأوقات ؟
إيه اللي ممكن عمله الدنيا
لبنت بعض الوقت تشبهها



أمي تفسر حلمها "البنات جوه الحلم دنيا"
والدنيا بره الحلم مش زي البنات
ماهاش سكات صبرهم ولا فرحة المواعيد
مش صافية .. زي أول يوم يروحوا المدرسة
ولا ليها دقة قلب في الخطوة
بتكعبل الفساتين



ولا بتضحك ولا بتبكي
ولا بتشتاق للعب الأولى ف الشارع
ولا بتخاف من الضلمة
ولا بتمسك ف إيد النور
هيّ / طبق بنور يدور بيهم
يفرح قلبهم حبة / ييكيهم
ماتشبهش البنات خالص
وأمي خايبة في التفسير



إيه اللي ممكن تعمله الدنيا
لبنّت كل الوقت تشبهني أنا
هيّ وأنا إن نختلف في الإسم
بيجمعنا الضمير والبوح
ليها نفس الروح معاندة
نفصح الحزن ف قصايد
ولا ننبهر من فرحة الفراشات




كله زي الطيف تقرب يختفي

أحزن / تقاوم / ننطفي

واحد

كله جوه الغربة واحد

كله بره الدنيا بيتوه ف الغياب



مرسومة بالأسود



ترسمي زي الطيف


تايهة كده نفسي

طفلة بفيونكة حمرا

ورا حلمها بتجري

والحلم زي فراشة .. مرسومة بالألوان

زهقانة من ضعفي .. هربانة هيّه كمان



أنا هت لما لقيتني .. شابة بوسط صَغير

مصبوبة رجليا .. منعاني إنسي أطيّر

حولي فراش حبي .. غررني إني اشتاق

والريح تحرك في قلبي .. أسراب من الأشواق

أشواق لقيتها شوك في صورة مش صورتي

شابة أكيد انما شابة على غلبي

فايرة بصحيح لكن .. مرسومة بالاسود !

الفهرس

الإهداء.....	٣
٣ بنات.....	٥
البيت.....	١٧
ملاك.....	٢٣
بنت موت.....	٢٧
رسالة ١.....	٣٣
رسالة ٢.....	٣٧
الرصف.....	٤١
قهوة فايرة.....	٤٧
تحت المطر.....	٥١
حزن السما .. بارد.....	٥٧
تخريف الحزن.....	٦٣
حبة عيال.....	٦٩
قوام البلح.....	٧٧
القاهرة ٢٥.....	٨١
هيّ وانا	٩١
مرسومة بالإسود	٩٩

